

Ferrando alijsque huiusce regionis celeberrimis Scriptoribus, quibus tamen repugnat græca collectio, ut fusè probauit Eminentissimus Cardinalis Perronius.

Obijciunt etiam ex Augustino. Victorinum, qui se Primate Numidia quasi seniore dicebat, ideo non potuisse Episcopos ad Concilium vocare, quod Episcopum Constantinæ Metropolis verum Primate haberent, ad quem id muneris spectabat: huncque volunt sensum genuinum esse verborum Diui Augustini, ex quo proinde inferunt duo genera Primatum fuisse in Numidia vniuersaque Africa, scilicet Episcopum Metropolis, & antiquiorem. Sed frustra conantur hunc eximium Doctorem ad suas partes euocare, cum iam ratio allata sit huius epistolæ scribendæ, dictumque hac vna ratione missam ab eo fuisse, quod contentio exorta esset inter Xantippum & Victorinum, quis horum antiquior ordinatione, & cui proinde cõpeteret Primatus. Imo hanc in eos retorqueri posse quasi acutissimum telum contendo, cum vtrique consulat Augustinus conuocare Collegas, qui ipsis Episcopatus ætate vicini erant, quique facile, quis eorum verum diceret & antiquior esset, diiudicarent.

Alia quædam addunt, sed minoris momenti, & quæ, ut mihi videtur, nulla responsione indigent. Idcirco quæ in vnaquaque prouincia sedes essent Episcopales dicendum: si tamen prius singularum limites, quos Ecclesia instituit, & qui ab alijs per Geographos designatis aliquatenus differunt, assignauerimus.

X.
LIMITES SIN-
CVLARVM
PROVINCIA-
RVM AFRICÆ.

PROCONSULARIS clauditur ab ortu & Septentrione pelago Africo, ab Occidente Tusca fluuio, & linea ducta à Tusca è regione Musti ciuitatis, secundo Rubricatum fluuium ad Bullam regiam, indeque ad Ammederam: à meridie diuiditur à Bizacena per lineam ductam ab vrbibus Ammedera & Vazua vsque ad flexum Bragadæ fluuij, indeque per Abderam & Vlizibirram ciuitates ad sinum Adrumetinum versus ortum, non longè ab Adrumeto.

NUMIDIA habet pro terminis ab ortu Tuscam fluuium, & lineam ductam ab eius fontibus per Rubricatū fluuium quem secatur è regione Bullæ regie, indeque iuxta eundem Rubricatum ad Libycas vsque gentes protensam: & ab Occidente Ampsagam, à Septentrione Mare Africum, & à meridie partem Libyæ interioris.

BIZACENA Prouincia ab ortu habet mare Africanum & Tritonem fluuium, ab occasu Rubricatum fluuium & Proconsularem, à qua per lineam iam dictam separatur: à Septentrione habet eandem prouinciam Proconsularem, & ab austro Libyam interiorem.

SITIFENSIS Mauritania habet ab ortu Ampsagam fluuium, ab occasu Nasabath, à meridie partim Libycas gentes, partim lineam infra descriptam, qua diuiditur à Mauritania Cæsariensi; & à Septentrione mare Africum.

MAVRITANIA CÆSARIENSIS habet ab ortu prouinciam Sitifensem, à qua separatur per fluuium Nasabath, & lineam ductam à fontibus dicti fluuij ad Audum quem secatur: indeque inter Cidamum & Tubunam vrbes, ad Gulum fluuium non longè à Germania vrbe vsque ad gentes Libycas: ab occasu terminatur Malua fluuio, à Septentrione habet mare Africum, & ab australi plaga clauditur gentibus Libycis.